

Minister Otmar Oduber

Oficialisacion di color di bandera lo wordo dialoga diamars

ORANJESTAD- Diamars binidero lo wordo trata e oficialisacion di e color di bandera di Aruba. Segun un comunicado di prensa minister di cultura esta Otmar Oduber a anuncia cu finalmente lo tin uniformidad den e color di un di e simbolonan nacional.

E comunicado ta conta cu pa hopi aña tabatin un discusion hopi grandi riba e color di e bandera, pero tambe por a mira specialmente e ultimo añanan cu tin un sin fin di colornan diferente di e bandera. E comunicado ta subraya cu sr. Oduber a splica cu ora papia di e color original di e bandera ta papia di e color larkspur cu ta aparece den e Dicticionary di The British Color cu for di aña 50 no a wordo continua. Sinembargo esunnan cu a scoge e color di e bandera a scoge pa e color

aki. Despues di a busca hopi a logra haya e diccionario aki na un libreria hopi bieu na London y awor Aruba ta conta cu un di nan pa por compara e color. E discusion tabata cu e color mester ta pareu of igual na loke e tempo ey United Nation Blue tabata, pero hasta United Nation a cambia su color di bandera cierto momento. Por lo tanto, Sr. Oduber ta splica cu awo ta mara nan mes na loke a wordo averigua e tono di color di

awendia cu ta mas cerca di e larkspur, ta e 279.

Awor lo bay mara e color aki den e ley y lo crea dos articulo adicional cu ta papia di esun cu ta bay controla pa no tin importacion mas di banderanan cu no tin e color oficial, Departamento di Cultura lo ta encarga cu esaki. E di dos articulo lo papia di sancion pa esunnan cu importa of bende e banderanan cu no ta e color di esun di Aruba. □

